

四庫全書

集部

欽定四庫全書

勉齋集卷十

宋 黃榦 撰

書

與李侍郎夢聞書

榦服職淮壩幸未退斤仰藉台庇知感知遇自去秋之
末眊所職汨沒應酬冬間感冒幾與世隔又其間有小
齟齬不敢拜興寢之間非敢怠也每得孫行之正字書
具言侍郎所以顧念之意甚至尤切感激榦資稟頑鈍

拙於處世致勤台念尤劇皇恐駑鈍之資於世事都不
通曉一行試吏恪守父兄廉勤之訓諸賢過聽以為有
才使佐邊州受命以來不勝悚懼冒昧此來目之所見
與平昔之所聞於師友者大異白面書生固不曉邊事
然載在方冊其本末源流昭然可考聖賢事業固難悉
言而上合天意下順人心盡體國之忠絕自私之念則
大經大本未有舍此而能自立者諸葛孔明所謂宮中
府中俱為一體黜陟臧否不宜異同只此數句便可得

三軍之死命卻司馬仲達而奪之氣也至於管仲之於齊范蠡之於越雖霸國之事而其規模經畫亦有次第皆守邊者之所當講明弱而能使之強貧而能使之富蕞爾之地而能使敵人恟疑而不敢窺伺雖使羊陸復生計無出於此者今所謂守邊者亦何必侍從臺諫之論薦宰執之所親擇哉雖州縣一吏亦可為也不過簿書期會之間而已彼知管范羊陸為何事哉幹之向者所以憚於一來亦自知其迂闊之見決不能與世合也

初亦甚以為駭今則頑然聽其自爾也然今日之事侍郎亦嘗畧思之乎敵運之衰人所共知盜賊四起人亦所共聞今每舉一細事必曰毋致張皇餘千里之長淮皆蕩然如無人之境而委寄於庸夫緩急安可恃耶紹興之初諸賢建復讐之議流離死徙有所不顧今守邊之事亦無有明白剴切而言之此天下有識之士皆不能無望於侍郎也安得一侍函丈開口一吐胸中之憤悶耶開禧丙寅之事兩淮荆襄之生靈肝腦塗地十室

九空有人心者亦當為之動念也侍郎家世忠孝而江西平賊之功又已試之效此擔恐不容辭避而亦天下之所屬望故敢冒昧及之榦大病之餘氣血衰甚歲前一至歷陽鞠獄旦夕徧淮垠巡視守把即至金陵總所稟議亦須參謁制帥入幕之事非所敢望也

安豐

榦自知踈拙不敢萌一毫寸進之念金陵贅員方挈賤累為久安之計忽蒙除郡之命自念踈遠何以得此吹噓之賜端有自來感激亡已聖賢相逢公論昭著尺寸

之長尚有可採輒破去前例不次而用之朝廷何負於士大夫敢不勉竭駑鈍以圖報塞漢陽為郡雖小國寡民然實吳蜀往來之衝武昌唇齒之國無漢陽則武昌亦不能以自立矣丙寅丁卯之事榦適在武昌親見其事武昌官民日夜望漢陽之烽火以為安否向使北兵數騎抵大別則武昌不攻而潰矣其不至漢陽者幸也然其為郡最小事權最輕郡無城郭郭內之民僅千家有兵二百人人月給米五斗多者一石朝來暮去若客

旅之視傳舍郭外沿江之民幾二千家皆浮居草屋視水之進退以為去住夏則遷於城之南冬則移於城之北若鴻雁之去來每歲二稅所入不及中州大邑之一都官吏請俸僅及中州三之一騶從不備往往徒行以是仕者憚來闕員殆半如此何以為國由是武昌視之若屬邑然而此邦官吏又不克自振其為衰陋未見其比也餘視賤事已兼旬首集郡兵而第其強弱倍支廩粟以活其家校其武藝之工拙數支賞給而士卒始有

固志自是嘗有應募而來者矣同官亦量其所得之多寡而優恤之與同甘苦百姓不問其已經縣未經縣已結絕未結絕應有詞訴一聽其來而曲直始有所伸民心安官與兵各得其所方漸有州郡氣象但土地褊小雖滕文公之賢亦不能以為善國也妄意亦欲有一二興創勢須洞究本末然後敢請於朝亦惟藉侍郎表言之重庶或不至於掣肘也但資質庸下精力衰憊恐不能仰副朝廷責望之意耳尚幸有以警策之

漢陽

餘久不拜隸人之敬拳拳尊仰實切此心進中兩承台
翰之辱不勝感悚修城事誠知朝廷事力決未能及此
但事屬利害不敢自默其行與否豈敢必耶鄭書先君
之交遊其令孫從宦於此豈敢忘之但同官亦多賢人
又只得視人物之高下以為先後薦舉之弊至此極矣
亦不敢全不顧公議下半年尚餘一章更容相度也幹
輒有誠切之懇冒瀆台聽紹興間一時先君輩行仕於
朝有聲當世凡數家如任如鄭皆是也惟先君不事生

產至今諸孫凡十三房皆無以自活榦之所以黽勉從
宦者亦為門戶之衰替耳非敢望榮免死足矣豈不願
浮湛仕途為門戶計加以名賢遞相推挽朝廷過聽超
躡亦豈不願奔走以赴事功實以年齡頽暮精力衰弱
不足以效驅策一去里閭凡十五年先君尚塋淺土墳
墓皆無人料理兄弟五人今所存者第三家兄年已七
十其窮到骨挈之來此則不堪扶曳捨之則又於心不
安榦少不自量好從當世名勝遊既冠而執經於晦菴

先生荷其一見便有相教誨之意未數年而授之以室
又數年而授之以官又數年而為之築室廬相約終老
相從之計其囑託之意則曰微言易墜汝其保之今先
師之亡十有六年矣翰奔走仕途束遺書於高閣手未
嘗披目未嘗睹也每一念之如負芒刺無面目以見朋
友死亦何以見先師於地下耶勉強從仕固足以恤孤
窮活孥累然一行試吏百事俱廢又於心實有所不安
也所以前日上祠祿之請益為此耳幸而得之則庶可

以了門戶之私計承先師之雅志韓亦得以婆娑丘園
諷詠遺書以祈寡過誠意未孚不蒙俞允蓋此意不能
盡白得相識書皆疑其為請築城不獲而求去又謂與
諸司恐有嫌而求去朋友之言且如此亦無惑朝廷不
從所乞也築城之事朝廷已令買木料矣非不從也便
使不從亦是公家之事又何至怨望而求去耶諸司皆
賢吳漕乃故舊綦總尤相愛為州郡者不過自盡其職
耳本無所嫌也孟子云不知者以為為肉孔子之出處

人尚疑之在榦則又何怪既被不允之命亦只得且安
之況災旱如此又豈敢便為求去之計偶讀邸報興國
趙守持本路倉節此則不容不力為求去之計益法令
之所不許物議之所不容是以又不能自己也趙娶晦
菴之女孫於榦以姻黨之親榦之長學生又與為友婿
監司按察州郡在榦繫是受察之人以親察親職事間
委有妨嫌今再以公割懇廟堂尚幸侍郎力為一言使
決得罷去不勝千萬之幸方今人物如林如榦等輩不

足比數苟得祠祿已為過分不足以勞朝廷之區處也
再有情懇漢陽郡計有餘郡官之俸差勝作縣到此數
月用度漸廣益親戚朋友未免有所責望今所餘無幾
矣朝廷若畀以祠祿歸家便有飯喫乃為大幸若朝廷
遂其雅意便就侍郎求建寧太守一書命下之日便得
却請尤感周旋之賜

與金陵制使李夢聞書

翰離里中之日拜領台翰之辱抵郡視事之三日又蒙

專人寵頒誨墨謙尊下逮捧讀感悚榦衰病不才奉祠
還里便已為終焉之計典郡之命初亦未敢祇受尋聞
制聞之命屬之一代偉人榦復得託在按臨之下是以
不敢復辭初亦欲取道金陵求聽約束而後行又恐在
道日久且或議其有所干請遂不果如所願得中都親
故書亦知台慈軫念欲置之幕府榦識見淺陋亦何足
以當此然既在部封屬吏之末則凡有所見所聞自當
詳悉吐露亦與入幕無異顧嘗平居以思則今日之事

誠不得不慮所以處之者亦誠有所甚難蒙古有崛起
炎炎之勢金人有遁逃衝決之虞羣盜有分裂割據之
憂邊民有乘時幸亂之意一動則百變交起其將何以
應之雖朝廷安靜國祚靈長誠有可恃然中原雲擾豈
能終無變哉特緩急異耳國家素以仁厚立國所以治
安三四百年然其弊亦以是而失之太弱東南風氣亦
不若西北之勁秦氏倡為和議而忠義之心益以消沮
今欲鼓而作之豈易事哉朝廷起尚書於士論所共服

之中自可以談笑而折衝於千里之外其所施行必有
出於世俗謀慮之表如翰輩安能效涓埃之益哉然
尚書之所以顧念者不啻如子弟骨肉則區區鄙見亦
不敢自默大抵當大任者亦須伸縮自由言聽計行然
後乃可為若謀之於外而制之於內人之所見不周而
事十全之利以吾之焦勞計慮而或者乃安坐而指其
小疵以議之則決無可為之理齊威之於夷吾勾踐之
於范蠡皆舉國以聽之而事業之就僅能如許則亦可

鑒矣今國勢之弱甚矣兵不素練財不素蓄人才不素
養舉世之人皆欲行其私以肥其身此何等氣象而欲
禦此大變耶當此任者非大有以更張之乃欲一切聽
命於人以參苓甘朮即愈沈疴九死之疾未見其可也
儒生之論迂闊而不可行俗吏之論鄙近而不足行惟
尚書超然遠覽起至強於至弱之中致至富於至貧之
地使前所謂四可憂者皆望風畏懼而萬一有乘吾之
虛而吾必有以制之庶乎其可也今之為制帥者或以

好殺而失人心或以偷安而不厭物議天下之望尚書者不但兩淮之兩路而已况廟堂之於尚書亦可謂相知之深者惟在我籌度利害使其足以壯國勢而消外侮毋陷於儒生俗吏之言亦當無不聽從者矣冒昧僭率皇恐死罪

榦被命此來視事已五日途中以奔走而不遑拜書到此又以冗擾而不敢拜書又以到任例修啟劄之常禮至今方能辦方敢敬陳悃悃龍舒素稱佳郡今乃大不

然闕正官日久倅甚賢同官以其攝事之故玩弛特甚
兩獄繫囚無一得其平者悉粗案索與之疏理夜以繼
日曾無少暇財賦失催縣道並不起解兩職官癯老者
不勝任少壯者不可任兩獄官或病心疾或已中風胡
倅最賢又榦之故舊今又得郡而去乃以衰老之身當
此紛擾此亦不敢自憚最是龍舒處地四平謂之舒者
以桐柏之山經信陽光州至此而始平夷也然全無城
郭之足恃楊通老僅能葺理子城亦未嘗包砌市井皆

在子城之外亦復何益開禧間張軍大者以數十人徑造郡城如入無人之境無城故也累政將官錢妄用而不思築城亦可謂無遠慮者舒雖近江而蘄黃又在舒之南蘄黃尚有城而舒獨無城可乎餘已託同官相度旦夕開具申稟餘昨乞築漢陽城而朝廷不從蓋以非要地故也然人之一身必有衣服一家必有牆壁既曰州郡豈可無城若無城則米糧不可積積之是資盜糧也器械不可修修之是借寇兵也如此亦何以為郡耶

況張軍大之事曉然可見豪傑之見覘者未必不垂涎也此則賴尚書力賜主張一郡千里之幸也餘出拜書遲緩不勝皇恐又以初交事詞訴紛紛然不容坐視申稟草率惟尚書視之如子弟之寫家書則庶幾免矣

投老此來所恃者有制使尚書知愛之厚耳安慶素稱佳郡及到此乃大不然揚國博則盡括諸邑之所入而邑至於不可為張舍人則盡括民間之所積而民至於不可活乃以羨餘獻之朝廷以自見其功是皆為父而

摧其子也子既貧則父亦不可繼矣揚則專事姑息而錢費於不必用張則專務興造而錢費於不當用今則郡計索然矣軍糧常欠數月則其他可知其最利害者則郡無城壁往者張軍大以數十人之衆如入無人之境尚不之鑒揚僅能治子城之壕民居皆子城之外張則朝廷行下令其築城乃為浮言以沮之書生不知事體無遠慮乃若此榦靜思一郡之大所以保生靈而為江南之屏蔽莫急於此與同官計度與居民商議皆以

為然亦欲半年之間可就其所申述具見公劄望尚書力賜主盟力申朝廷便從其請千萬幸甚今最急者欲得一壕寨官并曾經築城軍兵二三十人前來使喚今有一劄且以修北峽關隘本府城門為辭欲望劄付池州軍下火急差撥應副使喚所請於朝者甚微特三十萬緡其餘者皆郡元椿之錢耳惟尚書力為之言一郡幸甚殘寇衝哭此天速其亡耳然彼之亡與不亡皆吾所當慮也前書所陳屯田義甲兩事斷然可行不富不

強何以為國今之擾擾只得委之廬帥或委大軍數千人以禦之不可輕進敵人多詐一墮其計則士氣沮喪兩淮安危在此一舉吾之所以長久規模則又不可以此廢而不講今雨水如此彼豈能為吾患秋冬間必須大擾則義甲一事不可不早圖之也築城一事朝廷見從則幹尚可留然其專輒若此朝廷必不見賞若賞其罪而不從其請則幹決不可留只得引疾東歸便當以黃冠野服從制使尚書於金陵與諸公上下其議論或

能有一得之愚可裨末議

再與侍制李夢聞書

餘輒有私禱前書已略言之矣龍舒為郡財最匱乏楊通老為之最得善為郡之名然壞此郡者通老也此郡財賦全藉租稅既不通江則舟車不往來何緣得從容通老適當軍興之後人家交易頗多以是投印契日收千餘緡乃不為長久之慮恃其多資欲以自見而獻其羨餘於朝廷張敏則繼之又恥其不如前人悉按簿籍

盡追索人戶契照然後別造簿收割以此人戶亦無一
紙白契不來投印以此財賦之羨與通老等亦獻二十
萬以自見由是百姓遭竭澤之擾而不聊生矣二公者
財賦雖羨而不為長久之計一郡之大漫無城池之可
恃而可以為郡乎陳郎中繼張敏則之後當旱歉之歲
所積之錢皆耗於招納流移大抵迂闊類於吳勝之所
入既不及二公而二公所積悉已耗矣榦適承其後視
事之日便為築城之謀而郡帑乃如此前書所陳想尚

書亦深然之。幹已一面興工燒磚鑿石收買竹木。只俟朝廷給降錢物便可興工修築。秋晚可成。則今冬無慮望尚書痛賜矜念。若朝廷堅不從。則望尚書軫念。惟益之舊為幹作轉身計得早歸田里。不至在此誤生靈也。欲言千萬安得。一至尚書之側。開口一吐胸中之憤悶耶。更有少稟淮民困於起夫甚可念。此皆平日無措置倉卒只是擾害百姓。便有措置亦多不中節。卒不免為百姓之害。近漕司令起一萬八千夫運廬州米。此最為

害已具狀詳懇望賜施行幸甚

邊事不寧想尚書措置籌度良勞前屢聞捷報亦深以
為喜適聞二十七日三統制之敗極為寒心大軍自是
不足用但可張聲勢耳今乃深入以取敗衄是何輕率
如此聞有制榦者實主其事想是後生不曉事欲以是
取功名耳尚書今作如何主張以榦之愚莫若養威持
重牛酒日至以作士氣分據險要以防衝突以吾之逸
待彼之勞彼雖得一勝然所損亦多切不可又復輕舉

也暑氣漸熱彼未敢深入但秋高馬肥誠為可慮此兩
三月之間早作措置增兵聚糧廣納計策收用老成相
與圖事不可輕信後生之言以敗吾事至望至望餘目
今汲汲為城壁之計然費用不貲未必可就便使城成
亦無人可守攻既不可守又不能為之奈何亦只得盡
心力而為之耳漕司運糧一事督處可畏幸得使司行
下免差百姓歡舞但計臺必謂榦實有此請恐自此相
沿愈甚亦無可奈何便使罷去亦是為百姓也嘗謂淮

西一路監司太少合更置一提刑舊龍舒乃提刑置司之所今以一司兼倉憲抗治四司之事又安得心力可以幹當而使之中節耶方今邊事不寧莫若於兩路各添一憲擇老成有膽氣才略者為之使之措置守禦亦尚書之一助也蓋彼可以往來諸郡相度事宜為吾之羽翼也今計司事冗州郡刑獄屢申不報良以為苦此一策尚書不可不力言之如曹簡夫之類皆可使居是任也幕府更須求人日夜計度專人布此率略皇懼

浮光之警今已兩月矣但聞豐帥之除稍足為宗社慶
其他皆未見有所施行足為秋高之備者又不能不以
為懼今日之事且先見得大體如何來或和或戰尚有
可得商量今日決然是戰無可疑者前日敵人據有三
分之二吾又括江南之財賦以充常幣故屈已求和彼
必見聽今彼既為蒙古所驅失其巢穴豈肯甘心處河
南數州之地哉其垂涎兩淮以廣其境土者非一日也
今吾又絕其歲幣則彼之決於一戰既無可疑吾亦不

得不與之為敵和既不可則其勢必不可以不戰此大體之最易見者也大體既定則凡所謀畫無非為一戰之計幕府盈庭之論謀士借箸之言可以戰者從之不可以戰者卻之依違不決尚守屈已之論者斬之朝廷百姓同是此心同是此見然後先自朝廷進君子退小人延納忠讜之言斥逐邪佞之語凡前日苞苴奔競之風阿私朋比之習嚴行戒飭使朝廷清明天人悅豫然後有可以進取中原之實於是下哀痛之詔具言二聖

八陵之痛與夫屈已求和之辱開禧丙寅兩淮荆襄生靈塗炭之苦以激發忠臣義士之氣則朝廷之氣振矣其次則制司亦以至公盡誠感動人心非兵不講非戰不談各求實事毋事空談大軍之不足用久矣悉驅之淮上擇良將以御之擇其怯懦者戮之勇敢者常足亦未見其不可用也武定軍人皆以為可用然以今日招武定軍觀之則亦未必得其用也蓋武定軍者本汧淮有產稅之家向也為敵人所逐遂結為屯寨以護家口

或一二人或數百人已而無以為食遂互相吞併殺戮據奪不可禁遏朝廷急招之以為忠義軍於是相率而應募彼非樂為軍也特欲藉官中之錢米以自活耳已而改為沿淮又已而改為武定講解之後人人皆有放散之心蓋其元有產稅謂之戶家故不樂為軍而樂為農也今乃欲招之為軍則不過得其大不得已者耳其稍從容者決不敢就也不若便行下諸處使之自行招集結為部伍擇其頭首人命之以官使部轄之但使

之守護鄉井一旦有急則調發應援一聽官司之命庶幾稍從容者皆樂為吾用矣如彼中所謂千戶者想亦如此也大軍好與武定等人爭只是武定人權太輕若武定人如軒如夏之類使之自為一軍則大軍不敢陵之矣武定固可用然亦不可執一也嘗觀後唐末年事力亦已竭矣世宗取兩淮所遣策應軍以數萬計者不知其幾也今以吳蜀之地而兵勢寡弱乃如此可不早為之圖乎自大軍武定之外更合招募敢死之士於江

南諸郡得數百人自為一軍悉起諸郡配隸之人得數千人亦自為一軍各擇人以將之悉屯之兩淮要害之地則吾軍稍張矣財賦亦不難辦當此危急之際天下之財皆吾財有道以取之則人孰不樂輸哉古之立大事建大功者曷嘗拘攣顧忌而有為哉但此等事須是愛日而早圖之不可悠悠秋高馬肥束手無策大事去矣又有一說軍政不講久矣不可不早圖亦不足深恃中原遺黎引領以望王師之至有年於茲矣自敵人南

遷則酷用河南之民為尤甚。榦在安豐，見有士人徐師點欲結集淮民以取壽州，乃是壽州城中一富室，先為此謀以告吾境淮邊百姓高德，已有定日矣。偶爾敗獲，事不果。就後來探知，不特壽州為然，汝潁諸郡皆已願從矣。想今日淮北之民欲吾歸者，又當甚於前日也。今但呼淮邊一二豪傑諭以此意，使淮北之民先自壽州始，能以壽州降者，即以壽州之守命之。然後以武定大軍為之擁護，吾得一州則彼失一州之勢，以漸蠶食之。

不用寸兵尺鐵而中原可復彼將救死之不暇而暇謀人乎此策之最急者也聞京西已得其桐栢毗陵兩縣矣願早圖之制司欲招武定人更有一策向來武定頭目人今皆補官多在江南州郡此間亦有兩人便可按籍悉呼至制府與之商議仍令見任處州郡解每月請給以與之更以禮貌待之添與請受此數人輩皆可擢之以當主將之任者也如軒如夏皆其徒也王辛亦是一人之數此尤不可不便施行也亦有因一二小事竄

在他處者霍丘縣有一典押開禧間結集人以禦敵後立功補官為李制帥竄逐不知今在何處拔拭而用之當得其死力也又有李明兄弟見在合肥皆真可用之人也此乃招武定最急之策不可不便施行也聞幕中議論亦不一更宜招世所謂賢者聚之於書院與之議論可也餘此間已興工築城只用民兵廂禁軍弓手寨兵力不足則未免資之僧道寺觀人夫不足則未免以產錢高下勸率人戶度至秋冬之間可辦不敢更望朝

廷之錢也城磚諸邑運用但皆經由大江非大舟不可
載欲絕江池兩軍各借馬船兩隻并兵梢往來搬載輒
具公狀欲乞施行千萬幸甚

勉齋集卷十

欽定四庫全書

勉齋集卷十一

宋 黃榦 撰

書

與金陵制使李夢聞書

榦比奉使帖且準省劄具知制使學士尚書不棄惟益之舊意欲羅而致之幕府嘗謂制府辟屬雖未必有畫諾之益而所辟得失實係一世之觀瞻人心服則凡所施為自無有不應之效況今邊陲多事全在措置兵弱

而欲其強食少而欲其足人情之向背地形之險易敵勢之強弱非得有識慮之人旁搜博采驅馳計畫則環二千餘里之地豈能坐於堂上而洞見其曲折哉如張魏公之所辟客今已不敢多望近代如薛宣撫者尚能得林叔虎曹簡夫為之屬二公者亦皆今代之奇士所病者薛公知人而不善任使是以卒不免於狼狽今制使尚書乃欲以衰繆不才舉世所擯棄之人如榦者而充是選恐不足以厭伏人心而反為累也所幸朝廷且

為遷延之計蓋亦知其不足以當世選也然感激知己之恩則銘鏤肌骨不敢忘也此亦不敢抵受已抗章力辭亦微寓丐歸之意今土城已畢城之五門亦已包砌屹然為淮右之最一郡之人可以安枕而卧城磚已擇僧之善幹者二十人委之分頭燒辦仍許以寺有闕住持者必給補之亦無不樂從只俟春初凍解且燒且砌亦三五月可畢俟來春再上丐祠之請果從所乞當白衣從幕府賓客之後可效涓埃之報也邊事雖少息然

得沿邊報皆謂春夏之間蒙古既去則彼必專意於我
彼既能抗強盛之蒙古豈不能奮其餘力以侵吾之疆
場耶是亦不容不早為之慮也

幹迂疎狷狹生長桑梓於尚書未嘗有一日之雅從宦
江西伏謁之初便蒙顧遇異於儔匹自是以來薦拔覆
護蓋生平知己未有若是之特達深厚者也幹無所能
似少從四方之師友游涉歷世故今年幾七十矣竊亦
以為今代人物可以為國柱石扶持宗社非尚書其誰

與歸今者當閭外之寄以法從之尊下與韋布之士相
與為僚友如榦不肖亦預采取之列而真翰寵貽謙抑
慰藉皆非敢望於今之世者天下之士孰不聞風慕義
爭出死力以致驅馳於鞭策之下哉惟是榦之才識卑
下齒髮復衰顧既不足以備使令而南北大勢又復有
深可慮者言戰固未可輕言和尤為大謬紹興言和但
不能取中原耳今日言和且併江南而棄之也戰既不
可和又不可以彼之憤激當吾之偷惰是豈非深可慮

乎此非上下一意警策奮厲皆以國事為念蒐兵聚糧使長淮屹然有可恃之勢未見其可也縱曰未能亦且以兩淮付之尚書使得伸縮自由而無所牽制事猶有可為者今又動掣其肘則雖使伊周管樂復生今之世亦無所用其力榦也素於廟堂未嘗曳其裾而諸公貴人又多有惡其不附已者頭方命薄動招讒謗以義處之理當不仕俛首州縣直為貧耳今使之居元僚之任以參閫外之謀是昭昭然為的於天下人莫不彎弓而

思射之正恐不能為尚書之益而反以為累也更望尚書熟慮而改圖之不勝幸甚本府城壁既就五門亦已包砌上施敵樓下設重門屹然可觀兩淮之人過者驚嘆皆尚書之賜也但包砌城身其功倍於土城勢須來秋方得了畢益冬寒春雨皆非造磚砌城之時也

榦不自揆度妄談當世之務以瀆台聽者屢矣區區不能殫布之懷鬱結於中不容但已輒敢冒昧極言之今日之事其瑣細者不足言而人皆能言之其關於大體

者有四其一曰大本不可以不立其二曰大義不可以不明其三曰已私不可以不克其四曰人才不可以不收此四說者雖使伊周復生為今日計無以易此管樂以下亦未有不假此而能自立者然其不敢以望伊周者亦以於此有所未盡耳何謂大本不可以不立古之聖人垂拱於廟堂之上能使海外重九譯而來曰吾聞中國有至仁者大本立也諸葛孔明之出師也雖曰甲兵已足而必拳拳於進君子退小人宮中府中俱為一

體黜陟臧否不宜異同之數語亦可謂知本者矣今使將相得人其於大本可謂無恨矣丞相誅韓之後所以必消禍變者其於大本不謂無助惟其懲意外之變遂專用左右親信之人徃徃得罪於天下之公議世之君子遂從而歸咎於丞相丞相不堪其咎遂斷然屏逐而去之而左右親信者其用愈專矣平居無事紀綱紊亂亦不過州縣之間百姓受禍然至於軍政不修欺罔百出邊備廢弛皆此曹實為之若今大敵在境更不改圖

則大事去矣丞相所以寵任此輩者特以為自固之計
大事既去則雖欲自固可乎人之情言之於安平無事
之日則輕於鴻毛諫之於禍變將至之日則重於千金
今日之急莫大於此須得一二有識見有智謀能議論
識深淺之人數數遣赴廟堂宣議使之委曲曉譬以開
其惑此亦數以手書密布忠悃苟一言悟意則大本立
而天下定矣何謂大義不可以不明建炎紹興之間天
下忠臣義士莫不慷慨憤激捐軀赴死而君臣之大義

下至走卒亦能知之自秦氏倡為和議而此意日銷月
亡以至於今皆不知有所謂君父之讐也不惟百姓忘
之而士大夫亦忘之矣今觀詔旨之下與諸處宣諭之
文不過但言我不曾與汝為敵汝卻無故來侵我又不
過言汝從我則安不從我則危皆不出於彼此利害之
言亦何足以感天下豪傑忠義之心哉臣子之於君父
當如手足之捍頭目子弟之衛父兄主憂則臣辱主辱
則臣死此天之經地之義人之大倫不可易之理也祖

宗德澤涵濡生養二三百年凡吾所以衣食生養於天地間者毫髮皆君父之賜也至於禍變外起俘我二帝殘我陵寢蕩搖我中原又使我竭江南之金幣以事之天地以來所謂君父之辱孰甚於此今既為外敵所逐乃欲窺伺我淮甸又欲驅擄我百姓以廣其人民侵攘我兩淮以廣其土地至於言辭指斥無所顧忌此豈臣子所忍聞哉誠能日夜以此宣於上告於下使此意洞達則雖三尺童子亦莫不爭欲操戈以報不共戴天之

警矣大本不立則在內者無以服人之心大義不明則
在我者亦無以感人之心幽陰迫窄雖吾國之人亦且
不服又何以使外敵之我畏哉何謂已私之不可以不
克天下之事非可以聲言笑貌為也惟其意之誠而後
無感不通矣今尚書之身非尚書之身宗社之身天下
生靈之身也夫既非吾之身則凡吾身內之事皆不可
一毫芥蒂乎其心官則法從矣宮室則可居矣田園則
可食矣子弟則皆仕矣吾復何憂哉所憂者宗社生靈

耳榮辱得失皆不可以動吾之心苟有一毫涉乎已之私則必遁克而去之至於寢食居處常有與士卒同甘苦之意進退黜陟必求合乎理而毋徇乎吾之私情誠能如此則吾之氣已伸於萬物之上至大至剛而不可屈撓其明白洞達不惟吾之官屬服之而朝廷之上亦服之不惟江淮之軍民服之而敵國之人亦服之矣何謂人才之不可以不收古人所謂觀近臣以其所主韓公亦以為觀其賓客可以信其主人天下之人觀尚書

亦欲於其賓客觀之今皆未見其卓然可稱於世者不
過循循謹嘿而已至於一二經從於此亦自謂兩路而
僅得一人自謂以下僚而亦與賓幙者又皆諂諛而無
情實狡獪而用小數耳此何足以服人哉古之用人固
非一端雞鳴狗盜莫不賓禮然則一二巨人致之左右
則此輩亦皆足以備使令今大率不甚相遠則豈不見
輕於世哉縱曰辟客皆出於朝廷則擇世之卓然為人
之所推者卑辭厚禮招置東閣雖千百人皆不厭也人

才多則議論多議論多則為益多矣諸葛孔明出師後
表歷言其生平所得人物而今皆不在深嘆日月之逾
邁而事功之不立可謂知所先務矣近日吳畏齋猶能
以此得天下之譽孰謂尚書而不能哉天下之父歸之
其子焉往耶已私克於內人才收於外何事之不集何
功之不立哉所謂兵不強國不富非所慮也苟為不然
雖吾國亦不可保況敢望以取中原哉中原雖可取亦
何以使外患之不作哉人之所望於尚書者其下者則

求薦進其上者亦不過望尚書隨世以就功名皆不知
本末源流不知義理古今者榦之所望於尚書則欲其
為伊周與諸葛孔明欲復文武之境土使吾宋之國祚
永永無極也望尚書無以為老生之迂論則幸甚此四
言者藏之胸中已久不敢輕發也榦一介妄庸世所擯
棄獨荷尚書之知遇眷愛至深至厚故亦忘其愚不肖
常欲納忠於左右庶幾尚書之德業光明碩大度越一
世乃所以為知己之報也故自去歲以來所以獻其區

區之愚忠者屢矣今者維揚之行事無鉅細無不極言
尚書亦聽納不疑顧其至大至切者則未有所施行焉
此榦所以日夜惕然不能安也敵人侵邊亦既一年彼
其君臣上下日夜相與經營必欲得吾兩淮而後已雖
以歲幣為名而實不在乎歲幣也去歲五月休兵之後
使吾早夜經營以固吾圉亦何至今春三月之中三邊
衝突連亘數百里自去自來如入無人之境俘掠生齒
屠戮官軍焚燒室廬如此之酷哉事之已往固不必追

咎然亦豈可不深監耶今浮光兵退已兩月安豐兵退已一月盱眙兵退亦將兩旬矣不知吾所以措置者何事施行者何策但見邊備之弛又甚於前日日復一日恬不知懼但恐其禍又不止於今春矣向者輕信庸人之言為泗上之役喪師萬人良將勁卒精兵利刃不戰而淪於泗水黃團老幼俘擄殺戮五六萬人盱眙東西數百里莽為丘墟聞之者莫不惻然痛心比尚書巡歷見之最切者也安豐浮光之事大率類此尚書亦豈不

聞之乎竊意千乘言旋必欲痛自咎責出宿於外大戒於國曰此吾之罪也有能箴吾之失者疾入諫日與僚屬與四方之賢士討論條畫審思而力行之必將卧不能安枕食不能下咽也今歸已五日矣但聞請總領運使至玉麟堂賞牡丹用妓樂又聞總領運使請賞牡丹用妓樂又聞用妓樂宴僚屬而已邦人聞之諸軍聞之豈不痛憤請之人與吾所請之人雖相對而飲退而未有不竊笑者也惻隱是非人誰無之顧患不能克此心

耳苟充此心則視牡丹之紅艷豈不思邊廷之流血視
絲管之啾啾豈不思老穉之哀號視棟宇之宏麗豈不
思士卒之暴露視飲饌之豐美豈不思流民之調饑以
尚書之聰明豈不念此亦如謝安之雅量鎮浮方秦人
大舉入寇乃圍碁賭別墅即苻堅以八十萬之師入寇
謝玄以數千禦之大敗其師如此則敵國雖強若無足
慮者可以從容閒暇以應之矣然嘗觀苻堅至壽春登
城以望晉師見其行陣整肅心為之驚愕晉師雖寡而

玄能用之非僥倖而取勝者也今日果能使行陣整肅
耶苟惟不能欲處以閒暇亦何異小兒輩排棗栗以為
牲牢列瓦礫以為俎豆匍匐俯仰而曰周公之禮樂盡
在是耶榦非以為不合行樂也但以為徒行樂而不思
邊防耳苟思邊防亦何暇行樂耶祖宗二三百年之天
下兩淮數百萬之生靈尚書以法從之尊當四路之寄
敵國深侵內宇騷動主上食不甘味聽朝不怡大臣憂
懼不知所出尚書豈得不朝夕憂懼耶而乃如是之迂

緩暇樂耶今浮光之報已至矣北兵欲以十六縣之衆以四月攻浮光侵五關且以一縣五千人為率則當有八萬人攻浮光以萬人刈吾麥以五萬人攻五關吾之守關不過五六百人豈能當萬人之衆哉則關之不可守決矣五關失守則蘄黃決不保蘄黃不保則江南甚危矣尚書聞此亦已數日乃不聞有所施行何耶火然矣猶謂之安此榦之所以深憂永嘆不得已而發於言也屬意浮光將以窺五關也窺五關所以瞰長江也今

淮東委之應守以山東忠義守之矣濠與安豐未有警報設使有警濠去此為近亦可以調兵策應安豐亦有六安義甲足以擇之決不至使之深至江南惟浮光最急今且專意為浮光謀調武定五六千人分屯固始光山以捍其深入調蘄黃民兵以守五關仍關湖北借總効以同捍禦則庶乎可以無憂此則望尚書速圖之也或云朝廷靳惜財賦難以調兵殊不知苟失長江則雖有財賦將焉用之況蘄黃自有椿積米且得從權支借

異日事定漸為之圖不可顧慮一失事機則悔無及矣
或又云尚書決為還朝之計以故慮不及此尤非所以
望尚書也平居暇日猶當一日必葺況事之危急如此
豈得以吾將行而遽忘之乎朝廷若從尚書之請亦須
擇人以為代此非兩三月不可又孰有出於尚書之右
者乎況兩三月之內豈能無變乎此尤不可頃刻不關
念也榦衰老無用毫無功名富貴之念家故窮空隨例
作郡耳聞尚書之使來感激思奮以圖報稱歷陽既以

邊鄙不願就安慶又以有赴新任不可再往制叅之命亦是遙領不敢供職塊處驛舍以俟予往是知維揚之役本出尚書之意榦特徵贊之而同事之人以為與已異譁然而排之初以為召禍者其言既無驗矣又變而為虛費不論事體惟斷以私見大官唱聲萬口和附榦之寒遠豈敢逢彼之怒耶自今以往苟有小失莫不嫁其罪曰此黃制參之謀也噫可畏哉只得稱病杜門不敢造屏著然區區忠於尚書之意不能自遏故敢僭布

之猶有望於尚書深亮之也仍勿以示人千萬幸甚

榦衰病之迹已兩上祠請未報筋力支離不敢造屏著
夜來方丕父下訪繼而幕府諸丈亦來皆云尚書不以
其不肖欲委以西方之事此固願驅馳以報知己況在
屬郡守土之官亦復何辭退而自顧識見淺短既非其
才老病衰頹又無其力既不足以勝其任幕府英俊如
林又皆久於其職自足以笑談折衝乃使遠外衰病之
人當此重寄徒取訕笑徒取忌嫉竟亦何益尚書委任

下吏雖欲使之任責亦思所以保全其身此非所以保全之也自古謀臣策士各出所見以裨其上其言豈必皆當哉或是或非在上之人與所親信者決擇之耳則異日成敗皆決擇者之任今則不然泗上之役王穎叔嘗與謀矣王穎叔之意猶言燕可伐也所以伐之者尚書與幕府之責也今不幸而敗一則曰此王遂也二則曰此王遂也如此則誰復為我謀哉維揚之行出於朝廷之意尚書奉行之幹來自遠外特因訪問之間而微

賛其決耳紛紛之命未行也則曰必召禍幸而無事且
歸也則又曰徒虛費怫然不平以為異已較之穎叔差
輕耳是尚可預幕府之末議而當一面之重寄哉今以
西方之事責之一列郡之守尚書曰可幕府亦曰可幸
而敵不深入則將曰敵自不來耳不幸而微有衝突則
吹毛而索其疵則曰榦之罪也榦又何苦試身於不測
之禍哉此榦之所以雖感尚書知己之厚願竭愚忠而
有所不敢也今日之事可謂至危敵人能以弱而為強

吾國反以強而為弱此士大夫之罪也敵兵既退竊意制府之下惕厲悔前之失思今之得若不可以一朝居者今則不然尚書則曰吾有二萬武定不足畏也幕府則曰比柴守所申敵騎將至皆虛申也古之用師至六十萬八十萬而不以為多今以二三萬人而足恃古之用師常懷勿恃其不來之戒今則曰敵決不來此何言耶古之所謂足以喪邦者是也至於至小之事亦復如此且如武定人無器甲此特一事耳然行道之人皆言

其然也尚書曰吾已與之矣幕府亦曰吾已與之矣又
以為吾有八百人工匠日夜製造何以謂之無器甲哉
吾所謂無非全無也制府之所謂與亦誠與之矣特恐
與其一而遺其二耳不然何以行道之人皆曰無器甲
耶以制府之森嚴言之得以自達者百不一二也幸而
有聞亦當考核其故曰武定之額若干人吾之所給器
甲者若干副人人與之矣猶恐出戰之際箭鏃已發者
不可復收器械已鈍弊者無力以修整也況又未必有

耶古之用人皆當有以知其勞苦知其困乏使吾恩意
浹洽乎其心然後有以得其死力今則不然吾但欲得
汝以為吾用吾可以免其責汝之勞苦困乏吾不知也
汝異日之受禍吾不恤也近有金陵士子以書見投有
及丘宣撫之事者云丘一日欲招勇敢之士幕府請問
事例丘判云錢一百貫銀六兩幕府以為太多丘判一
死字其意以為欲其致死豈不直錢一百貫銀六兩耶
只此一字誰不願為之死耶至今聞之亦使人感泣也

今制府用人能若是耶使幹而任西方之寄則上下皆
曰吾有人以任其責矣有請則不報有求則不獲亦何
以異於言武定之無罷甲者耶夫不能用人則欲得其
力此乃今日之大病而又不能聽人之言而用其長嘗
觀近日出而圖惟國事其能自有所為者莫若辛幼安
不能自為而資人以有為者莫若吳德夫辛幼安之才
世不常有如吳德夫者常人可學而能也吳之在荆南
也外而幕府十餘人內則士友十餘人賓客之往來者

不絕於賓謁每旦出見客投獻利害者以大紫袋負之以歸吳公輒以夸於人曰今日復得一牛腿矣言所得之多也即送之書院書院之士友參考之幕府之議論士友亦得與聞飯後凡遇晚士友及幕府各以所見來告上下其議論而求其當然後從而行之間舉酒一二觴夜坐漏下數刻而後退吳公又數以言語慰藉之察其有無而賙恤之以是事無不知知無不行今尚書接人則既踈矣聞人之言未嘗商確必行也幕府辰入酉

出其與接尤少則亦何以周知天下之利害云今莫若
先出文牒具言敵人侵擾旬淮引咎歸已卑辭下意以
求裨益委文官忠厚禮下者一人置司於轅門之外應
有投獻者不拘早晚悉令接見受納文字問其居止然
後委幕府詮其言之有益者遣人請之相見而慰藉之
反覆而究問之其無可采者亦第其高下饋其薄禮則
天下之利害莫不周知矣尚書亦以為然至今未有所
聞想亦以為敵人已退不欲自暴其失不欲謂已不能

而求於人也夫自謂已能而不資諸人雖堯舜孔孟不敢如此既不能自有所為又不資人以有為則終於無所為而已以無所為為心亦無怪其以武定二萬人為足恃以柴守所申為妄以武定無甲為非也縱使武定真可使敵人真不來兩淮真已寧靜亦且可以偷安於旦暮今棗陽被圍百日城之不陷者如髮棗陽陷則長驅而來破應山掃黃陂蘄黃兩城不攻而下則兩淮豈得為寧靜耶兩淮荆襄之勢如人一身關節相通一處

被害則百節皆痛非若六國之勢韓之禍不及乎魏趙
之害不與乎燕也然六國尚且合從以禦秦况棗陽尚
被兵而可謂兩淮已寧靜耶此榦之所以日夜憂慮如
坐針氈之上而不敢寧也尚書曷亦思之乎人事久乖
天變屢見宗社之危甚於累卵又豈得上下安坐欲以
一方之事付之老繆之人而遂以為無慮耶如前所陳
言語雖繁其大要有三思慮淺則不能周知利害而動
失事機接物簡則下情不通而聞見少與人寡合則人

心睽而無以得其死力尚書誠以是三者反覆思之知宗社之為重而不知吾身之為貴知智謀之可取而不知一己之有所長則庶乎其得矣幹老矣不知外物之可慕兩作邑而為倅兩貳郡而為守又兩試郡矣狼懷自用僅足以充筦庫之任天下公議未嘗以為能也素行之不孚自應至是尚書辟以為元僚朝廷且使之任郡事則不可以復在左右矣今又言語狂悖不知深淺如此非尚書亮之而誰耶今欲使之任西方之事豈不


為馮婦所笑耶

別副

竊謂兩淮之事亦不難處欲乞尚書急呼安豐軍路分
韓全正陽水軍統制王文中武定將官徐抃李明及安
豐寄居吳主簿名時升安豐直學張籌命州郡津遣速
來與之商議榦與數人者皆有舊且相信必能得淮西
所以守禦之實如六安洪縣尉者檄之以來亦可與商
量山中義甲正不待榦之親行也陳桐城一出已半月

想更四五日即回縣併檄之使來稟議仍以淮西之事
委之可也適有來相訪者因問以浮光之事其人云安
豐至浮光各有人守把敵人若來亦可一戰以決勝負
惟浮光之西如中渡最緊要皆棄之不顧王馬二將但
閉城自守耳沿淮守把固未必濟事然折柳樊圃亦足
以使狂夫之驚顧今乃捐百里之地無一夫之守是開
門而望其不來也此等事不因人之議論亦不及知乞
以台意詰問光守使之措置為佳棗陽急危則黃州以

西不係六關亦合措置更合密行下黃州令其條具乃
佳然此非重兵截其衝突不可也



勉齋集卷十一

欽定四庫全書

集部
勉齋集卷十三

詳校官庶吉士臣吳烜

主事臣呂雲棟覆勘

總校官庶吉士臣倉聖脉

校對官中書臣王家賓

謄錄監生臣陸肇脩

欽定四庫全書

勉齋集卷十二

宋 黃榦 撰

書

復吳勝之湖北運判

宋勝

榦伏拜台翰之賜捧讀不勝感悚但因執事有間不敢數以吏牘干犯威嚴特於台候起處之詳及施行條教無非為國為民實政不勝敬嘆伏候台翰曹運榦所傳聞其事或亦誠有之但不專為使臺攔客舟而行是事

稚魯無能之人自其少年已絕科舉矢志學道僻識寡
諧賦性狷狹與物多忤每竊自念樸拙周旋斯世動輒
齟齬孰若窮耕田野與世相隔絕為樂乎偶得一官浮
湛寸祿聊以自活兼得養老回顧初心終日凜然如負
芒刺直以君相之恩不敢不為此來但俟半考即上祠
祿之請此語自都運寺丞艤舟敝郡亦嘗及之矣至五
月半即半考數日來遂委一二同官先期相迓新所用
之金令項椿管置辦從物庶幾解印而去見管之錢皆

是實數耳此或者所以傳其有浩然之興也然幹也官
先師之官學先師之學先師平日去就之義皦然今衰
老如此而不知退是受其官而忘其教也於我安乎此
浩然之意亦誠非妄傳亦非全為攔米而然也攔米一
事使臺施行委欠商量特不欲有請耳米舟不之鄂渚
而之漢陽漢陽小郡下情易通客旅之詞訴易達官吏
有所抑勒牙儉有所邀阻可以徑達於太守之庭鄂州
太府則反是治其源流斯知矣今散遣官吏勒客舟之

米不得之漢陽而之鄂州如此則漢陽之百姓不隸於
湖北而為化外之民矣在鄂州行之則可在使臺行之
恐非公視一路之意在他人行之則可在都運寺丞行
之則恐未免或者之議假令漢陽郡之官吏於金口攔
鄂州米可乎況名為攔米而實為攔稅本為鄂州而託
之使臺情狀曉然前所云翁大人不疑人欺我耳今台
翰以為未必然天下事不知當論理耶當論例耶朝旨嘗
有中流為界不得視為具文捨朝旨而用舊例非所以

示訓也鄂州之與漢陽無歲不爭似此施行鄂州為
直乎漢陽即非直乎監司平兩郡之直者也而又啟之
可乎中流為界久矣所不請者不必請也昔者夫子問
禮老聃門下所向不合老聃氏退然與物無競夫子嘆
云吾今日見老子其猶龍耶榦嘗請事斯語及與物接
察言觀色苟有不合則望鞭影而急去不敢競也州郡
財賦粗足可矣政不必多求積貯漢陽軍置錢監常歲
附鑄二萬緡以助軍用其先所謂一萬緡其後監官每

以此邀州郡之舉若不如其請則多方沮抑自輸到此
覺其如此惟緘口不言附鑄漢陽軍無萬緡錢將不為
漢陽乎便通濟米舟悉為鄂州所據則漢陽軍亦不至
於不為郡也況又既不為久留之計又不必爭可否實
是衰瘁不惟無富貴之念實無功業之想無家可歸無
田可耕判作餓死何向不可蓋此計已決不但為攔客
舟而然也後月之望未免徧以公狀申諸臺乞為備申
丐歸田里更望都運寺丞力賜扶持千萬幸甚曹簡夫

得書旦夕即到此豪傑之士紛然而起國勢益強外患
自弭衰病無能之人得以止足山樊歌詠大德以終餘
年莫大之幸也

築城一事戎司終不以為然榦之所以建此議者亦是
戎司壕塞路炳者相與熟謀之初非出於己意今所差
來人堅以為不可築則以今日之亢旱如此自非興工
之日又米價頓長一倍則築城之人糧食之費皆倍於
前日矣以此思之不若已之為愈曹榦亦深以為然翌

日具狀申兩司也

昨承不鄙訪以救荒之策，餘於都運寺丞豈敢不用其情。今早見制司行下一劄，仍答使司所申者，其說甚堅。然在彼之責，亦只得如此。以餘觀之，此事亦不甚難。只覺幕府無人商議耳。都運寺丞只得端居深念，或更於一路之內，檄一二有心力人相與商議，事無不可為者。不然，則以彼淺近之智而經理天地之變，未見其有濟也。餘適與曹文說，制司便不放米出界，吾豈得不差人。

密行收糴使司選委人物任以此事諸郡誰不聽命耶
制司既所執如此之堅使司只得申朝廷乞於湖南江
西豐熟州郡撥椿積米應副鄂州以時價給還之此無
不可者以都運寺丞之事權而又為廟堂所倚重苟有
所請當無不從也大抵此等事要處之有道有毫髮不
到便能生弊官吏之不任責此大可慮者也曹運之所
為本軍不當分彼此蓋鄂州米價原不同於漢陽商旅
皆有捨西而東之意苟不通融和糴竊恐漢陽之商旅

死於溝壑亦不少矣漢陽兩邑一郡共二十萬家凡大郡者不得不為之深思遠慮今差官而攔米是棄薄之也第恐米舟經稅之後則越踰他界如此只得多遣舟船於漢口以上守等可也此皆榦之區區拙謀未知於事體有當否也王介甫云善謀家者資於國善謀國者資之天下善謀天下者資之於百姓榦思之莫若急遣人於江西湖南收糴以待都運寺丞尚疑此郡有彼此之分則乞令張道過此熟與之議必有至當之論做官

最是大官不可為既隔下情又不能不資於同官所謂同官者類皆不足與謀此事之所以難濟也台諭所謂米舟不至乃州縣迎合制司或因以為利此說恐未然榦每謂使都運寺丞守德安將禁米乎將不禁米乎禁米則違上司之命不禁米則害百姓二者孰緩孰急榦但聞德安復州亦已狼狽饑民嗷嗷矣今乃專欲咎之恐未安也古人言遏糴之禁謂此凶而彼豐今數州俱為旱歉而可咎之乎况通融雖是美事然處之有道

可也古人告糴如晉告而秦輸乃官司散遣人糴可也
官司自糴則所糴有限量又安所用而告焉今欲聽客
旅之自販則所販有限量而又或適他郡或俟價高不
惟為彼方之害而亦為吾郡之害也如雲夢孝感自有
水路徑趨淮西不經漢陽官司莫之覺也李貫之提舉
書云江東一路自問朝廷乞得米三十萬石又有常平
米三十萬石又自糴得十萬石以一路而有七十萬石
之米何饑歉之足憂今不廣圖之而日夜歸咎於凶荒

乏數郡以吾為部使者而汲汲然為鄂州而治也郡米
既不至而徒傷吾公平廣大之意豈亦未之思耶幹嘗
謂為監司郡守與作縣不同作縣是親民最緊底處每事
可以立見底蘊郡守則已隔一重監司則又隔兩重監
司郡守之於人戶詞訴但當只令索案或且令具因依
申然後徐察其詞之是非而處之今若憑一紙狀詞便
為施行鮮不十事而九失者不可不察也本軍糴米或
加五六價錢低於市價亦誠有之而實有不說本軍市

井有三樣斛有文思院斛此官省斛也有黃池斛客人
所常用也有打買斛軍學所置客旅交易必請此斛官
收斛錢以養士也打買斛者兩斛三斗為一石五斗文
思院斛公私交易皆通用者故人以為甚便也價錢反
低於市價今以諸斛通論之客人糴米五碩五斗為正
價若以價錢論之已糴七百八十會子矣豈得以其反
低於市價而病之乎且市價起於何人不出於民不出
於官而出於牟利之商賈今日一貫明日二貫又明日

三貫市之牙儈從而和之此細民所以受病也而可從之乎官司為之約度使商賈獲倍稱以上之息而不到於橫為無限之求官司依所糴之價而糴與百姓則商與民俱無害矣客人哽噎而不能言非畏官府也是亦自知其不可也若其冥頑嗜利幸災樂禍以負吾民者又何足多恤哉故曰小仁者大仁之賊也是豈不可察哉諸葛孔明之治國以大德不以小惠大丈夫行事磊磊落落正當如是也築城事只當如此知其事之

可為而不以告不忠也知其時之未可為而不以告者亦不忠也所謂恐或者得以議論此一句最關利害吾人處事但當自信不必隨人恐其議論而曲意以從之可乎其亦不敢說不為但說須是有錢有米耳況餘之去意已決不敢承當此事世事難言都運寺丞天下之所謂正人端士更幸日親天下之賢者以講明義理之正毋徒曰資質可恃事業可致以道理自居卒陷於功利而不自知也世間最緊要事甚不多為聖為賢為堯

舜為湯武為伊為周皆從此出若捨卻這些子緊要處而論功業便教做出漢高祖唐太宗蕭曹房杜亦何足道哉若於此曉解世間利祿真是糞壤世間事業真是太空一點浮翳也何足把玩哉幹之所以急欲歸山者老先生傳授一粒金丹亦欲歸去靜坐服食庶幾老死可以見先師於地下而無愧也若浮湛世間為庸人所軒輊以求區區之名利是猶持千金之璧以易一瓦缶非所願也承聞使節欲以點船絕江儻得伏謁以承誨

論何幸如之以都運寺丞知遇之厚不自知其言之狂且僭也

辭知潮州復鄭知院

餘辱朝廷之知遇恩寵至深至厚拔擢超躡皆出望外自知衰老甘自退藏豈期軫念下逮枯朽便當疾趨豈宜遜避竊念餘處世多艱氣血衰瘁自臨川得痰喘之疾今已十年矣忽於今夏五月之間結為痞塊卧則沈伏行則膨腹一日之中半在牀褥起居百無聊亦自

知此身旦暮不保已治丘壟誅茅其間方將移居以便
藏骨豈敢復有意於仕宦哉若勉強就道不過中途立
見踣斃此決不可以不辭者近者習俗偷薄逐利忘義
祖先墳墓有累年不拜掃者家君察院草葬於水泉沙
礫之中家兄知縣之所藏亦為螻蛄所食諸孫中無一
人自立者方日夜為之經營庶年歲間畢此二事今若
捨之而去則存之與歿抱恨無窮門戶卑微始祖墳墓
亦為強宗所侵銜冤抱痛無路自訴若不為之經理則

數年之後不可復任矣此皆至痛至切而不容捨者家兄見存者年七十有五飢窮至骨向來從宦分俸以養今雖家居亦得察其有無共其乏困今挈之以行固不可舍之而別亦不安諸姪飢寒亦費區處此亦皆人道之所不容已者又有難以告人者餘年方及冠從遊於朱文公之間其所以撫存而卵翼之者不啻已子其所以然者非有他故也以幹從學之久庶幾粗得其立言垂世之大意可以與後進之有志者相與訂正以垂之

將來庶不至微言之絕而大意之乖是則文公相與之
大意如是耳榦又何足以辱其知遇之厚哉二十年來
厯宦為貧舊學日廢每一念之如負芒刺奉祠以來方
得與朋友數人日夜討論漸成保社方深恨向者告歸
之不早若復既歸而又出則安得面目復見文公於地
下耶此則人心之事所至痛者而不敢以告人也榦家
世雖貧素守詩禮自榦一從祿仕困於朱墨子姪輩氣
習漸異前人非彼之不可教此既不暇教之而游玩紛

華之習反有以害之也兩年家居一守儒素方覺氣習
漸變今豈宜啟之以故態耶人之仰祿為子孫耳今既
壞其心志則雖多藏以遺之是適所以資其愚不肖也
此又憂深思遠之不容不然者閣下試以是數者而思
之則榦今日之或出或處斷可識矣仰恃閣下之眷憐
故敢布露心腹無非由中之言實無片辭矯飾非若世
俗之虛為禮辭者欲望鈞慈特賜寢免

榦憔悴無聊疾病轉劇前幅所陳無非實狀仰蒙某官

委曲誨諭進退出處之語無非至論可謂曲盡但榦今日之事非能仕不欲乃欲仕不能惟有哀鳴造化乞此一日之命正終丘園則千萬幸甚更望力賜重言於二府庶得微誠洞達早遂卑請若再得祠祿一任則兩年之中一室孥累俱獲溫飽他非所敢望也榦兩月無祠祿便覺丐代費力望閣下早賜垂念給與祠請以救此涸轍之困幸甚別紙所示榦久留山間投閒養病遂用劄子實封遣人繳達之亦未得回報榦極為其所知然

自到任亦只得兩三次隨衆謁見以其情性有未易以
常情測度者故亦不敢有言想閣下備知其詳若常常
開論以成其美亦鄉邦之幸也近蒙其以鄉中士友相
問餘偶有一館客亦自知其賢遂枉騎訪之徑補以學
職其人感之遂上諫書極言其失里人皆云自此漸覺
和平彼自精明苟知其過亦不憚改也

餘伏自昨者敬伸不得已之禱朝夕凜凜以俟方命之
誅公朝眷憐俯從卑欲既脫州麾之責以叨祠廩之優

於老且貧莫便於此且蒙鈞翰曲賜撫存化工生物之
仁委曲懇到乃如此舉室感激未易名言惟是奇蹇之
迹入春以來無日不病日夜思治尺牋以致二府之謝
自念不敢以吏書為禮而氣疾所梗莫難於據案以是
至今未能畢緘府吏踵門忽復叨真翰之賜跪誦三復
大非衰賤所宜蒙至於憂勤宗社之意出處去就之宜
當功業之方興而動婆婆綠野之念屈公相之尊而下
友於山林之棄人盛德謙光可為世法百拜十襲以為

子孫無窮之榮餘莫年多病百念灰冷儻得未就溝壑則溫尋故書以祈寡過向非朝廷大恩畀以祠廩則今已不免為溝中瘠矣然亦有未能不過慮者祠祿正以補田租之闕則可以卒歲而無飢入春已兩月種不入土並海之田鹹潮浸灌今雖得雨亦已無及近城之田皆不可耕山邑泉源霑足之田亦皆枯涸更旬月不雨則歲事已矣豈敢復望田租之入哉但聞旱勢頗廣則一家一身之利害不敢計也以公相變調之力而以感

召和氣變災為祥者反覆手耳此特草野之過慮也或以一春無不雨之理然榦昨守漢陽郡自正月不雨以至九月飢民流離纍纍滿道傷弓之餘故誠不能不過慮耳榦老病日加終日塊坐舉動頗艱生平不避勞苦晚歲自應如此重蒙閣下軫念帷蓋之舊特有珍劑之賜雄附五十隻鍾乳十貼其品格氣味皆非人間所常有者寶藏服食苟活一旦之命無非大造更生之賜也專使之回輒扶病敬布謝悃窮居不能端謹伏乞鈞亮

辭再知安慶府

在知潮州前

餘一介庸賤無足比數蒙足下之顧遇拔擢超躡家故
窮空孳累猥衆筮仕十有五年皆得食租衣稅不至流
離餓殍毫髮皆閣下之恩也雖身膏草野亦不足以言
報今至於復其舊職乃有辭而不就者畏清議避機穽
也畀以列郡而不受予之藩府而受之此豈能免當世
之譏議况其所至動與物忤非閣下之庇護已不復有
今日矣况敢自蹈於不知廉恥之地哉築城所以保民

也建議之初已譁然而見攻矣及其速成則曰是必勞民也及其費省則曰是必擾民也元僚之辟制府之請也五關之守禦浮光之督戰制府之命也未及行而嫉之者至矣眇然庸儒何足以知天下之大計乃創為之說曰是道學之徒喜言大義談恢復者也守土之臣去制府五六百里邊郵之事未嘗與聞一或失宜則曰是嘗與謀也軍旅之際征役繁興民不堪命少陳利害則曰是素喜爭也東羅西網一舉足且蹈其中憂畏憤懣

殆無容身之所正使無厯陽之除亦當哀鳴造化以求
避況今嫌隙已開豈敢冒犯清議試身於不測之禍哉
倅安豐則得罪於太守守漢陽則得罪於監司今怨咎
滋起復有其兆矣是皆稟資狷狹賦分奇窮有以取之
也餘開禧年中從事荆南幕府往來入關備厯險阻因
得嘔血之疾目今痼疾復發加以痰喘不可支吾儻蒙
鈞慈特賜憐憫投畀山林自同麋鹿之遊以涵泳聖化
於寂寞之濱生死肉骨之恩沒齒不敢忘也不然政恐

異日議論橫生雖閣下愛念之深亦恐不能以茫之也

復林正卿

竊觀所論作易大旨本於陰陽錯綜而成者大意甚善其所與本義之旨不同而先生以為不信其大者亦不過兩端而已先生則以易之作本為卜筮而夫子釋之以垂教老兄則以易之作本為垂教而伏羲文王借之以卜筮此其旨若非有大異者然如老兄之說則恐於作易本意及易書本文皆不能無失亦不得為小誤也

竊嘗思老兄之意蓋以天地露許多機緘做出一箇圖書聖人用許多工夫看得一箇義理今卻別無用處只將來作卜筮用了故必欲將作垂教之書而卜筮特其一事卻不知聖人於圖書之妙義理之原心通默識則凡其見於日用之間施設之際固無適而非是理之歸亦曷嘗棄之以為他皆無用而專以卜筮耶至於一部易書則原其本意卻只為教卜筮而作耳蓋卜筮自非小事吉凶生大業者蓋出於此況上古之世民淳俗質

誨以義理亦未必深曉使之一舉一動皆取決於卜筮則事弗非而民弗疑而教人之意又未嘗不行乎其中則卜筮亦豈小事也哉今必以為教人之書則非為卜筮也亦甚矣况易書之文所謂利所謂勿用所謂吉凶所謂悔吝者其文皆主於卜筮而發所謂畜牝牛田獲三品之類又於設教之意亦且迂遠而難明聖人著書垂教本以開示後世使人易曉又何苦為是艱深難測之辭以眩人觀聽哉今乃捨是不言而專指師比最分

曉之卦以為設教之書則執一而不通矣若作卜筮看則所以如此則吉所以如此則凶者非義理之所寓而未嘗不可以為教必以為非為筮卜則於作易之旨易書之文皆有所不通餘之所謂亦非小誤者此也大抵吾友天資清勁讀書不能平心以觀故其失至於如此試更思之為佳鬼神之說大槩得之而更有未盡者偶收在家中過於公行不及取以奉答悉俟令姪歸報去也有可垂教毋惜往復

今以文王周公之辭為卜筮分曉故又欲以伏羲之易
不為卜筮及文王周公借是以為卜筮則亦自覺其說
之不通矣自覺其不通而不肯捨遂欲將伏羲孔子作
一樣說文王作一樣說孔子於文王周公卜筮之中闡
而為垂教之義乃是有功於易文王周公乃於伏羲垂
教之義抑而為卜筮之用則是得罪於伏羲大矣卜筮
既為不切之具而文王周公乃用一生工夫壞卻伏羲
一部義理是何不知不仁之甚耶如此則孔子便當削

文王周公之書而專使伏羲之意又乃祖文王周公之後為人注解不切之書何耶此其說不通之甚者也

與潘謙之

榦此間糧食雖已竭而治生粗有倫理朋友相聚人之多寡不必論但得臭味相似庶幾交相切磋以張吾道耳今所賃屋不知何地人少則東山桑溪小寺中亦可以為終歲之聚也若得蚤定庶歸來便得讀書為佳歲月易度若非閏月則春已莫矣契兄昆仲及成叔兄弟

能偕來否先生衰病氣滿筋攣然修書誨人之意未嘗頃刻忘也吾輩可謂懶惰之甚者當相與努力以副其所期也今歲之集更須倍加功以補此空閒之月乃佳鄙意欲每日相聚共看經史文集不以長少各立程課庶一日有一日之益不至虛辱朋友之意尊兄更為熟思法度見教

韓十二日登舟十七日早已抵家朋友相候之久重以為愧生平僻執誤事如此可以為戒也縣學極齊整又

日瞻先聖以為依歸莫大之幸不知尊友能一來相聚
旬月否兩月得侍先生誨論方悟向來學問差處尤欲
與朋友共正之齊中規矩只得十分嚴整不然誤人子
弟罪有所歸也廿一日入學廿二日便畧與諸友擬試
俟補試後諸友齊集鳩金買牲舍菜於先聖遂講光齋
之禮初一日即立定規繩讀大畧如此恐吾兄欲知之
也

尊兄久寓京城朋友相信向亦不妨講學又得賢主人

亦無入而不自得也富貴說甚平正然卻不如書中所說之痛快也蓋說中大抵是歸之於命其意以為可曉愚人然人心蠹壞至此極矣如三十年痼疾非一二服平胃散所能療孟子作乞兒斥罵以樂正子之賢尚有舖啜之譏則其他可知義利上須是先見得分明方不至拖泥帶水也此中絕難得朋友講學已約蔡伯靜數十朋友為季集一年亦得四次相見各述所見以相質正庶幾不至寂寥之甚但亦未有成說耳

餘近在甘泉因與林正卿講及一貫忠恕一章見其所說毫釐之差而於古人之意全不相似乃知吾人講學不可不與朋友共之以此欲與兄款聚之意甚切計八月間彼中諸事已畢千萬撥置為我一來但至此不能走見反欲坐致從者為愧已甚計兄亦必不我怪也

餘嘗謂天地之間無獨必有對以天言之則貧對富貴對賤窮對通泰對否以人言之則出對處進對退隱對見仕對止古之人惟義所在隨遇而安未嘗有所擇也

氏年以來士大夫風俗只揀一邊好底都不要一邊不好底於已則利矣其如義何此風一長望其舍生取義殺身成仁決無此理況出處去就雖是相對然去與處乃其常出與就又是偶然之變今乃以變為常以常為大不幸殊不可曉至於利害之際則留連眷戀而不肯舍至於可恥可賤發於羞惡之本心者一切不問此又豈易與俗人言哉安得一見相與劇論哉

答潘謙之

幹碌碌遠宦無足言者極邊重地守貳之間意見不協
朝廷寬恩姑令易地初亦欲乘此丐歸而臺論又為之
辯白不欲激抗黽勉就職已於五月四日交賤事要之
在已無以取信於世又不能阿邑求售賢者不度事勢
力相推挽反以取當路者之賤薄朝夕念歸然一覺於
義可以少留則又且浮湛為仰祿計耳行年六十有三
矣每思師友之訓令人惕然以慙也尊兄今歲安寓或
云留興化果否陳安溪已除六院能與之偕來亦佳此

間相去不遠又可以相見也鄭子立相見否鄉間朋友
難得得其意向如此肯與吾人相親又才氣亦非常流
吾人只得扶持之彼既多與世不合吾人又疎遠之恐
非所宜也

韓蹤跡想不知其詳此間初自不合來以朝廷拔擢不
敢辭到此百怪皆有真不成世界以虎狼之暴盜賊之
狡而當方面之寄視百姓如草管視僚屬如奴隸此豈
可入其境哉初亦自理郡事不復相關適以大旱渠自

與吳漕為敵始則相抗而遣卒數十人入本軍之境攔截米船不得過武昌既而吳聞之朝廷又欲奪本軍之米以媚武昌其行遣之間可怪可笑初亦以吳為賢且得相依吳又不曉事使客氣漸以相及只得引疾丐祠以歸數郡大旱監司無一人問及餓死不可勝數更不堪者眼數百人為羣上人家丐米丐者奪之異名也又只得捕而戮之是何世界如此餘幸而力抗兩司糴得米四五萬石以賑糶所活者萬家他皆不暇恤也自此

且得歸家讀書教子不能在世間與此等異彙為伍也
有傳師復監簿論對之章見之者三復敬嘆使臣子之
鯁切皆如此國其有不興乎煩為致意甚恨相見之晚
也適方得孫行之書感感此間只俟省劄下或代者至
皆可行要不出此月也相識皆煩致意既為閒人亦不
敢作朝士書也到家亦便欲歸福州省墳墓親戚家兄
年老多病諸姪貧困流落皆急欲一相見也

勉齋集卷十二